

Vo de guete und de schlächte Zyte

Musical score for the song 'Vo de guete und de schlächte Zyte'. The score is written in G major (one sharp) and 4/4 time. It consists of six staves of music. The lyrics are written below the notes. The chords indicated are D, G, A7, and E7.

Mir läben i're leide Zyt,  
 's gheit aues abenang,  
 so säge d'Lüt hüt mängisch,  
 es gruusi sen afang,  
 doch vilech isch's zu aune Zyte  
 so gsi, weder äbe,  
 so nünedryssg bis füfevierzg,  
 da het me möge läbe:

Wie schön isch's dennzumale gsi,  
 wo wott das mit dr Wäut hüt hi?

Denn isch's im Summer warm gsi,  
 und im Winter chaut,  
 u für 'ne Bächer Bier het me  
 denn non es Zwänzgi zaut.

Denn het no niemer gredt vo Härz-  
 infarkt u schlächte Zäng,  
 u d'Gielehaar sy churz gsi  
 u d'Meiltizüpfe läng,  
 u mi het nid aus ggänggelet  
 u ghouft grad was me gseht,  
 u aus furtgheit, was eim isch vürig  
 gsi, wie's hüt so gscheht:

Wo wott das mit dr Wäut hüt hi?

Wie schön isch's dennzumale gsi!

Oh wär's doch wider so wie denn,  
 es gluschteti eim bau.

Zwar teeu hei scho chli Päch gha, aber  
 wäger lang nid au.

U di wo Päch hei gha, sy ja  
 vüra nid Schwyzer gsi,  
 Mir Schwyzer hei scho gluegt, dass men  
 üs het i Rue la sy,  
 Denn isch me no zum Militär  
 u het sech nid scheniert,  
 u mi het no Reschpächt gha  
 u het nid reklamiert:

Die Reklamiererei dürhar  
 isch hüt e ganz e grossi Gfahr,

u die verwöhnte Junge hütigs-  
 tags, die Stürmihüng,  
 we's wider so wie denn chäm, ja,  
 da stürmte si de nümm!

Mir läben i're leide Zyt,  
so säge d'Lüt, u drum,  
wär's vilech guet, we's wider mau  
so chlepfti zringsetum:

Teeu säge zwar, we's wider so  
chäm, preich's üs dasmau sicher o.

Doch mir sy ja so harmlos, gäbig,  
fridlech, brav u nätt,  
u das wär afen uverschant,  
we's üs o preiche tät!